

UNDANG-UNDANG KECIL
KOPERASI BUMIRA BERHAD

BAHAGIAN I

PERMULAAN

1. Undang-undang Kecil ini bolehlah dinamakan Undang-undang Kecil Koperasi Bumira Berhad dan hendaklah mula berkuatkuasa pada tarikh ianya didaftarkan oleh Ketua Pendaftar. **Tajuk dan mula berkuatkuasa.**
2. Di dalam Undang-undang Kecil ini, melainkan jika konteksnya menghendaki makna yang lain — **Tafsiran.**
- "Akta" ertinya Akta Koperasi 1993 dan pindaan-pindaan yang dibuat kepadanya dari semasa ke semasa;
- "anggota" termasuklah seseorang yang turut sama dalam permohonan pendaftaran Koperasi ini dan seseorang yang diterima menjadi anggota mengikut Peraturan dan Undang-undang Kecil ini selepas pendaftaran sebagaimana yang ditakrifkan di bawah seksyen 2 Akta;
- "anggota eksekutif Lembaga" ertinya mana-mana orang yang dilantik sebagai anggota sepenuh masa Lembaga Koperasi ini dan terlibat dengan pentadbiran dan pengurusan harian urusan dan perniagaan Koperasi ini sebagaimana yang ditakrifkan di bawah peraturan 2 Peraturan;
- "aturan-aturan" ertinya aturan-aturan yang dibuat oleh Lembaga dari semasa ke semasa bagi melaksanakan mana-mana aktiviti yang dijalankan oleh Koperasi termasuklah skim simpanan khas atau skim pemberian pinjaman atau kemudahan kredit, tertakluk kepada peruntukan-peruntukan Akta, Peraturan, Undang-undang Kecil dan kelulusan mesyuarat agung perwakilan;
- "dividen" ertinya bahagian keuntungan Koperasi ini yang dibahagikan di kalangan anggota-anggotanya mengikut kadar modal syer atau modal yuran yang dipegang oleh mereka sebagaimana yang ditakrifkan di bawah seksyen 2 Akta;
- "elaun" ertinya saraan yang dibayar kepada seseorang anggota Lembaga atau seseorang anggota Jawatankuasa Audit Dalaman bagi Koperasi ini sebagai balasan kerana khidmat-khidmatnya yang diberikan kepada Koperasi ini secara tetap, sebagaimana yang ditakrifkan di bawah subseksyen 46(3) Akta;
- "kesalahan boleh daftar" ertinya kesalahan yang boleh didaftarkan di bawah Akta Pendaftaran Penjenayah-penjenayah dan Orang-orang Tak Diingini 1969 sebagaimana yang dinyatakan dalam Jadual Pertama dan Kedua kepada Akta itu;
- "Ketua Pendaftar" ertinya Ketua Pendaftar Koperasi yang dilantik di bawah seksyen 3 Akta dan termasuklah mana-mana Pendaftar apabila menjalankan kuasa-kuasa Ketua Pendaftar sebagaimana yang dianugerahkan kepadanya di bawah seksyen tersebut itu;

"Koperasi" atau "Koperasi ini" ertinya Koperasi Bumira Berhad;

"Lembaga" ertinya badan pengelola Koperasi ini yang kepadanya pengurusan hal-ehwal Koperasi ini diamanahkan sebagaimana yang ditakrifkan di bawah seksyen 2, dibentuk menurut perenggan 42(a) serta tertakluk kepada seksyen 44 dan 45 Akta;

"Menteri" ertinya Menteri yang pada masa ini dipertanggungjawabkan dengan pembangunan koperasi sebagaimana yang ditakrifkan di bawah peraturan 2 Peraturan;

"pegawai" ertinya seorang pengerusi, setiausaha, bendahari atau mana-mana anggota lain Lembaga dan termasuklah mana-mana orang lain yang diberikuasa oleh Peraturan atau Undang-undang Kecil ini untuk memberikan arahan-arahan berkenaan dengan urusan Koperasi ini, sebagaimana yang ditakrifkan di bawah seksyen 2 Akta;

"Peraturan" ertinya Peraturan-peraturan Koperasi 1995 yang dibuat di bawah Akta dan pindaan-pindaan yang dibuat kepadanya dari semasa ke semasa;

"perlantikan" termasuklah apa-apa perlantikan atau perlantikan semula melalui pemilihan sebagaimana yang ditakrifkan di bawah seksyen 2 Akta;

"perwakilan" ertinya wakil anggota-anggota individu, yang dipilih di mesyuarat peringkat kawasan anggota-anggota Koperasi ini, bagi menghadiri mesyuarat agung perwakilan sebagaimana yang ditakrifkan di bawah seksyen 2 Akta;

"potongan langganan" ertinya bahagian keuntungan Koperasi ini yang dibahagikan di kalangan anggota-anggota mengikut kadar banyaknya perniagaan yang dilakukan oleh mereka dengan Koperasi ini dan yang daripadanya keuntungan Koperasi ini diperolehi sebagaimana yang ditakrifkan di bawah seksyen 2 Akta;

"prinsip-prinsip koperasi" termasuklah —

- (a) keanggotaan sukarela dan terbuka;
- (b) pengurusan yang demokratik;
- (c) pulangan terhad atas modal yang disumbangkan oleh anggota-anggota;
- (d) pembahagian keuntungan dengan saksama;
- (e) penggalakan pendidikan koperasi; dan
- (f) kerjasama aktif di kalangan koperasi-koperasi berdaftar;

"sabitan" termasuklah sesuatu dapatan bersalah dan pembuktian kesalahan sebagaimana yang ditakrifkan di bawah seksyen 2 Akta;

"simpanan khas" ertinya wang yang didepositkan oleh seseorang anggota dengan Koperasi ini dengan niat nyata untuk menggunakan wang yang didepositkan itu untuk suatu maksud yang dinyatakan yang dibenarkan di bawah Peraturan sebagaimana yang ditakrifkan di bawah seksyen 2 Akta, dan tertakluk kepada Undang-undang Kecil ini;

“subsidiari” ertinya sesuatu syarikat, sebagaimana yang ditakrifkan dalam Akta Syarikat 1965, yang komposisi Lembaga Pengarahnya atau lebih daripada separuh kuasa mengundinya dikawal oleh Koperasi ini, atau yang lebih daripada separuh modal syer diterbitkannya dipegang oleh Koperasi ini, dan termasuklah sesuatu subsidiari, sebagaimana yang ditakrifkan dalam Akta itu, bagi syarikat itu;

"syer" ertinya bahagian dalam modal syer bagi Koperasi ini yang disumbangkan oleh seseorang anggota berkenaan dengan keanggotaannya dalam Koperasi ini sebagaimana yang ditakrifkan di bawah seksyen 2 Akta;

“tribunal” ertinya tribunal yang ditubuhkan di bawah seksyen 83 Akta;

"Undang-undang Kecil" ertinya Undang-undang Kecil ini dan termasuklah sesuatu pindaan berdaftar kepada Undang-undang Kecil ini;

"wang berlebihan" ertinya wang yang melebihi amaun yang diperlukan oleh Koperasi ini bagi kegunaan segera sebagai modal kerja bagi perniagaannya yang boleh didepositkan atau dilaburkan di luar Koperasi ini tanpa menjejaskan pengendalian perniagaannya sebagaimana yang ditakrifkan di bawah seksyen 2 Akta;

"yuran" ertinya jumlah wang yang disumbangkan pada lat-lat masa yang tetap oleh seseorang anggota berkenaan dengan keanggotaan dalam Koperasi ini dan boleh dikeluarkan apabila tamat keanggotaannya, sebagaimana yang ditakrifkan di bawah seksyen 2 Akta.

Perkataan-perkataan yang bererti tunggal atau jamak, masing-masing hendaklah meliputi tunggal dan jamak, dan perkataan yang bererti jenis lelaki hendaklah meliputi jenis perempuan.

BAHAGIAN II

NAMA, ALAMAT BERDAFTAR DAN KAWASAN OPERASI

- | | |
|---|-------------------------|
| 3. Menurut subseksyen 7(4) dan (5) Akta, Koperasi ini hendaklah dinamakan Koperasi Bumira Berhad. | Nama. |
| 4. Alamat yang didaftarkan bagi Koperasi ini ialah Lot 3.20, Tingkat Dua, Medan MARA, No. 21, Jalan Raja Laut, 50357 Kuala Lumpur dan Koperasi hendaklah memberitahu kepada Ketua Pendaftar dalam tempoh yang ditetapkan di bawah subperaturan 47(2) Peraturan tentang tiap-tiap pertukaran alamat menurut seksyen 11 Akta. | Alamat. |
| 5. Bagi maksud perenggan 26(c) Akta, kawasan operasi Koperasi ini ialah di semua Negeri-negeri di seluruh Malaysia. | Kawasan operasi. |

BAHAGIAN III

MATLAMAT, TUJUAN DAN AKTIVITI

6. Matlamat Koperasi ini menurut subseksyen 4(1) Akta ialah untuk meningkatkan kepentingan ekonomi anggota-anggotanya mengikut prinsip-prinsip koperasi. **Matlamat.**
7. Tujuan-tujuan Koperasi ini ialah untuk menjalankan fungsi-fungsi kredit, pengguna, perumahan, perladangan dan pengangkutan. **Tujuan.**
8. (1) Bagi mencapai matlamat yang tersebut di dalam undang-undang kecil 6 amnya dan tujuan yang tersebut di dalam undang-undang kecil 7 khususnya, Koperasi bolehlah, tertakluk kepada peruntukan Akta dan Peraturan, menjalankan aktiviti-aktiviti berikut: **Aktiviti-aktiviti.**
- (a) mengalakkan anggota menyimpan sebahagian daripada pendapatan mereka dan memberi pinjaman kepada mereka untuk tujuan yang berfaedah;
 - (b) membuat kontrak dengan mana-mana pihak dengan tujuan Koperasi ini;
 - (c) membeli, menjual, memindahkan hak milik, mendirikan, menyewa, mencagar, memajak, menggadai dan memiliki harta-harta alih dan harta-harta tak alih;
 - (d) melaburkan wang berlebihan dalam perkara-perkara yang dibenarkan di bawah seksyen 54 Akta;
 - (e) mengadakan subsidiari di bawah seksyen 19 Akta dengan kelulusan Ketua Pendaftar; dan
 - (f) menyertai usahasama dan menjadi anggota kepada koperasi-koperasi lain.
- (2) Bagi melaksanakan aktiviti-aktiviti di bawah fasal (1) undang-undang kecil ini, Koperasi boleh mendapatkan modal dengan cara mengumpul syer, yuran dan simpanan khas daripada anggota-anggota. Koperasi juga mendapatkan pinjaman-pinjaman daripada anggota-anggota dan bukan anggota tertakluk kepada peruntukan-peruntukan seksyen 50 Akta.
- (3) Bagi mengendalikan sesuatu aktivitinya yang disebutkan di dalam fasal (1) itu, Lembaga hendaklah membuat aturan-aturan aktiviti yang sesuai yang diluluskan oleh mesyuarat agung perwakilan dan satu salinannya dikemukakan kepada Ketua Pendaftar.
- (4) Bagi melaksanakan skim berhubung dengan simpanan khas atau pinjaman, menurut peraturan 26 Peraturan, Lembaga hendaklah —

- (a) menyediakan suratcara berasingan yang menyatakan dengan jelas terma-terma dan syarat-syarat bagi tiap-tiap skim;
- (b) mengemukakan suratcara skim itu kepada mesyuarat agung perwakilan untuk kelulusan; dan
- (c) mengemukakan satu salinan suratcara yang diluluskan itu kepada Ketua Pendaftar dalam masa satu bulan selepas diluluskan oleh mesyuarat agung perwakilan itu.

BAHAGIAN IV

KEANGGOTAAN

9. Anggota-anggota Koperasi ini terdiri daripada sekalian mereka yang turut sama dalam permohonan untuk mendaftarkan Koperasi ini dan mereka yang diterima menjadi anggota selepas pendaftaran mengikut Peraturan dan Undang-undang Kecil ini dari semasa ke semasa.

Anggota.

10. (1) Keanggotaan Koperasi ini terbuka kepada :

**Kelayakan
menjadi
anggota.**

- (a) Anggota Kerja MARA;
- (b) Anggota Kerja Projek MARA;
- (c) Anggota Kerja Anak-anak Syarikat MARA;
- (d) Anggota Kerja badan/organisasi yang dahulunya ditubuhkan oleh MARA.

(2) Menurut seksyen 26 dan 27 Akta, seseorang yang ingin menjadi anggota Koperasi ini mestilah —

- (a) warganegara Malaysia;
- (b) telah mencapai umur lapan belas tahun;
- (c) bermastautin atau bekerja atau mempunyai tanah dalam kawasan operasi Koperasi ini; dan
- (d) bukan seorang yang terhadapnya masih berkuatkuasa suatu sabitan bagi kesalahan boleh daftar, atau tidak upaya dari segi mental, atau bankrap yang belum dilepaskan, atau pernah dibuang daripada keanggotaan mana-mana koperasi dalam tempoh satu tahun.

11. Permohonan menjadi anggota hendaklah dibuat dalam borang rasmi Koperasi ini dan dialamatkan kepada setiausaha.

**Permohonan
menjadi
anggota.**

12. (1) Tiap-tiap permohonan menjadi anggota hendaklah disertakan dengan fee masuk sebanyak dua puluh ringgit. Fee masuk itu menurut perenggan 50(a) Akta akan dikembalikan kepada pemohon jika permohonannya ditolak oleh Lembaga.

Fee masuk.

(2) Bekas anggota yang memohon untuk menjadi anggota semula dikenakan fee masuk sebanyak lima puluh ringgit.

(3) Penama atau wakil yang sah menurut seksyen 24 Akta kepada anggota yang mati, jika layak menurut undang-undang kecil 10 dan memohon untuk menjadi anggota dalam masa tiga bulan selepas kematian anggota itu, tidak dikenakan fee masuk.

(4) Semua fee masuk hendaklah dikreditkan ke dalam akaun untung rugi.

13. (1) Menurut subperaturan 10(1) Peraturan, seseorang yang memohon untuk menjadi anggota hendaklah diminta menandatangani suatu ikrar bahawa dia akan terikat dengan Undang-undang Kecil ini dan aturan-aturan aktiviti yang sedia ada dan apa-apa pindaan kepada Undang-undang Kecil dan aturan-aturan tersebut, yang dibuat dengan sah semasa tempoh keanggotaannya, dan bahawa dia bukan seorang bankrap yang belum dilepaskan atau seorang yang terhadapnya masih berkuatkuasa suatu sabitan bagi kesalahan yang boleh daftar dan dia tidak pernah dibuang daripada keanggotaan mana-mana koperasi dalam tempoh satu tahun. Mana-mana pemohon yang enggan menandatangani ikrar tersebut tidak boleh diterima menjadi anggota.

**Ikrar
anggota.**

(2) Menurut subperaturan 10(2) Peraturan, seseorang yang telah menjadi anggota dengan sebab turut sama dalam membuat permohonan bagi pendaftaran Koperasi ini dikehendaki menandatangani ikrar yang serupa dalam masa empat puluh lima hari selepas diterima perakuan pendaftaran Koperasi.

14. Permohonan menjadi anggota hendaklah dipertimbangkan oleh Lembaga dalam mesyuaratnya yang boleh menerima atau menolak sesuatu permohonan itu tanpa menyatakan sebab-sebabnya. Seseorang yang diterima menjadi anggota hendaklah diberitahu secara bertulis tidak lewat daripada tiga puluh hari selepas penerimaannya itu.

**Penerimaan
menjadi
anggota.**

15. Menurut seksyen 28 Akta, tiap-tiap anggota yang telah menjelaskan bayaran penuh seratus ringgit syer bolehlah melaksanakan segala hak, kewajipan dan liabiliti sebagai seorang anggota sebagaimana yang terkandung di dalam Undang-undang Kecil ini.

**Perolehan
hak,
kewajipan
dan liabiliti
anggota.**

16. Tiap-tiap anggota hendaklah diberi dengan percuma satu naskhah Undang-undang Kecil ini. Naskhah tambahan akan dikenakan bayaran sebanyak dua ringgit tiap-tiap satu.

**Pemberian
Undang-
undang Kecil.**

17. (1) Tiap-tiap anggota yang bukan Muslim hendaklah, dengan mengisi satu borang rasmi Koperasi ini, di hadapan sekurang-kurangnya dua saksi yang mengakusaksikan perkara yang sama atau dengan suatu akuan yang dibuat sewajarnya, menamakan seorang atau lebih daripada seorang sebagai penama yang kepadanya syer atau kepentingan anggota itu atau nilai syer atau kepentingan itu atau apa-apa wang lain yang disebut dalam seksyen 24 Akta yang kena dibayar kepada anggota itu boleh, dengan kematian anggota itu, dipindahkan atau dibayar menurut seksyen tersebut itu, dan anggota itu boleh dengan cara yang sama dari semasa ke semasa membatalkan atau menukar penamaan tersebut. Dalam hal-hal sedemikian, nilai syer atau kepentingan anggota itu hendaklah sama dengan jumlah wang yang sebenarnya dibayar oleh anggota itu untuk memperolehi syer atau kepentingan tersebut itu sebagaimana yang dinyatakan di bawah subperaturan 7(1) Peraturan.

Penama.

(2) Tiap-tiap anggota Muslim hendaklah dengan cara yang sama seperti yang diperuntukkan dalam fasal (1) undang-undang kecil ini menamakan seorang wasi dari kalangan waris-waris terdekat yang mutlak tassarrufnya untuk menerima setelah dia mati wang-wang yang terhak baginya di dalam Koperasi ini bagi diagihkan kepada waris-waris yang berhak mengikut hukum Islam dan hendaklah memberitahu Koperasi akan perubahan-perubahan, jika ada, mengenai penamaan itu.

(3) Tertakluk kepada undang-undang kecil 10, seseorang penama atau wasi bagi maksud subperaturan 7(3) Peraturan, bolehlah diterima menjadi anggota dan penama atau wasi yang demikian itu hendaklah dianggap telah menjadi anggota mulai tarikh anggota yang digantikannya itu diterima sebagai anggota.

18. (1) Liabiliti seseorang anggota terhadap hutang-hutang Koperasi ini sekiranya pendaftaran Koperasi ini dibatalkan hendaklah terhad kepada jumlah syer yang dimilikinya.

**Liabiliti
anggota.**

(2) Liabiliti seseorang bekas anggota terhadap hutang-hutang Koperasi yang ada pada tarikh keanggotaannya terhenti hendaklah tidak berterusan lebih daripada dua tahun dari tarikh itu seperti yang diperuntukkan di bawah subseksyen 35(1) Akta.

(3) Harta pusaka seseorang anggota yang telah mati hendaklah menurut subseksyen 35(2) Akta, tidak bertanggung bagi hutang-hutang Koperasi yang ada pada tarikh kematiannya itu lebih daripada dua tahun dari tarikh itu.

19. Menurut peruntukan seksyen-seksyen 26, 27 dan 29 Akta, seseorang anggota akan hilang kelayakannya sebagai anggota jika dalam masa menjadi anggota dia —

**Hilang
kelayakan
sebagai
anggota.**

(a) hilang kewarganegaraan; atau

(b) hilang keupayaan dari segi mental; atau

(c) diisytiharkan bankrap; atau

(d) disabitkan atas sesuatu kesalahan boleh daftar; atau

(e) dibuang daripada keanggotaan mana-mana koperasi dan suatu tempoh selama satu tahun belum lagi berlalu dari tarikh pembuangan itu; atau

(f) tidak lagi bermastautin, memiliki tanah dan bekerja dalam kawasan operasi Koperasi; atau

(g) telah menjadi anggota koperasi berdaftar lain yang tujuan utamanya ialah untuk memberikan pinjaman kepada anggotanya.

20. (1) Keanggotaan seseorang anggota terhenti atas sebab-sebab di bawah ini, mengikut mana yang berkenaan:

**Terhenti
menjadi
anggota.**

(a) mati; atau

(b) menarik diri mengikut undang-undang kecil 21; atau

(c) dibuang mengikut undang-undang kecil 22; atau

(d) mungkir membayar yuran yang dijanjikan tiga bulan berturut-turut dengan tiada kebenaran Lembaga;

- (2) Lembaga hendaklah menyingkir seseorang anggota yang —
- (a) didapati membuat ikrar palsu di bawah undang-undang kecil 13; atau
 - (b) menurut peraturan 11 Peraturan, hilang kelayakan sebagai anggota di bawah undang-undang kecil 19; atau
 - (c) terhenti keanggotaannya di bawah perenggan (c) dan (d) fasal (1) undang-undang kecil ini.

21. (1) Seseorang anggota boleh menarik diri daripada Koperasi ini dengan memberi notis bertulis tiga bulan terlebih dahulu kepada Lembaga. Atas sebab-sebab yang munasabah, Lembaga boleh membenarkan penarikan diri dalam masa yang singkat.

Menarik diri.

(2) Melainkan tarikh lebih awal dipersetujui oleh Lembaga, maka keanggotaan anggota itu hendaklah terhenti hanya pada hari genap tempoh notisnya.

(3) Dalam tempoh notis itu, anggota yang demikian hendaklah masih mempunyai hak, kewajipan dan liabiliti sebagai seorang anggota.

22. (1) Jika seseorang anggota melanggar mana-mana peruntukan Undang-undang Kecil ini atau melakukan mana-mana satu daripada perbuatan-perbuatan berikut:

Pembuangan oleh mesyuarat agung perwakilan.

- (a) merujukkan pertikaian atau aduan kepada mana-mana orang selain daripada Ketua Pendaftar atau tribunal; atau
- (b) membuat kenyataan dalam akhbar atau mana-mana media massa mengenai Koperasi ini tanpa kebenaran Lembaga; atau
- (c) membuat tuduhan palsu ke atas anggota Lembaga atau anggota-anggota atau bekas anggota atau pekerja Koperasi ini sehingga menyebabkan anggota-anggota berpecah-belah dan berpuak-puak; atau
- (d) memburuk-burukkan Koperasi sehingga mencemarkan nama baik dan menjejaskan urusan perniagaan Koperasi ini; atau
- (e) bertindak di luar etika mesyuarat agung sehingga menjejaskan perjalanan mesyuarat itu,

dia hendaklah dianggap telah bertindak dengan cara yang memudaratkan kepentingan Koperasi ini dan bolehlah digantung keanggotaannya.

(2) Keputusan untuk menggantung keanggotaan seseorang anggota boleh dibuat oleh Lembaga hanya setelah anggota yang berkenaan itu diberitahu secara bertulis mengenai tuduhan yang jelas terhadapnya dan diberi peluang untuk menyatakan sebab-sebab mengapa keanggotaannya tidak boleh digantung.

(3) Tiap-tiap kes penggantungan hendaklah dibentangkan kepada mesyuarat agung perwakilan yang terawal dan dijadikan sebagai agenda pertama, dan anggota yang digantung keanggotaannya itu hendaklah diberitahu secara bertulis tidak kurang daripada lima belas hari sebelum diadakan mesyuarat, tentang tarikh, masa, tempat dan haknya untuk membela diri akan dijalankan di mesyuarat itu.

(4) Sebelum mengesahkan atau menyetujui penggantungan itu, mesyuarat agung perwakilan hendaklah mendengar penjelasan anggota yang digantung oleh Lembaga itu, jika dia memilih untuk memberi penjelasan, dan keanggotaannya tidak lucut melainkan jika mesyuarat agung perwakilan dengan undi dua pertiga daripada anggota yang hadir membuat keputusan membuangnya.

(5) Sehingga perkara penggantungan keanggotaannya diputuskan oleh mesyuarat agung perwakilan, anggota yang berkenaan itu tidak mempunyai apa-apa hak dan kewajiban sebagai anggota melainkan hak menyuarakan hal penggantungan keanggotaannya itu di dalam mesyuarat agung.

23. (1) Jika seseorang anggota terhenti daripada menjadi anggota Koperasi ini mengikut undang-undang kecil 20, semua wang kepunyaannya melainkan nilai syer miliknya setelah ditolak hutangnya dengan Koperasi ini hendaklah —

**Penyelesaian
wang
anggota.**

- (a) sekiranya dia dibuang, dikembalikan kepadanya dengan segera tanpa apa-apa syarat; atau
- (b) sekiranya dia hilang keupayaan dari segi mental dan tiada pentadbir bagi pusaknya atau tiada pemegang amanah bagi hartanya yang telah dilantik, dikembalikan kepada sesiapa yang difikirkan wajar untuk menerima bagi pihaknya sebaik sahaja penerima itu ditentukan; atau
- (c) sekiranya dia mati, dikembalikan kepada penamanya atau warisnya atau wakilnya yang sah mengikut seksyen 24 Akta. Disyaratkan bahawa bagi seseorang anggota Muslim, pengembalian tidak boleh dibuat melainkan kepada wakilnya yang sah atau kepada Pegawai Pentadbir Pusaka jika selepas enam bulan dari tarikh kematiannya, wakilnya yang sah tidak dapat dipastikan atau telah tidak dilantik; atau
- (d) sekiranya dia menarik diri, dikembalikan kepadanya selepas akhir tempoh notis; atau
- (e) sekiranya dia tidak lagi bermastautin, mempunyai tanah dan bekerja dalam kawasan operasi, dikembalikan kepadanya dengan segera.

(2) Penyelesaian mengenai syer-syer seseorang yang terhenti keanggotaannya sebagaimana yang ditentukan dalam akaun teraudit terakhir Koperasi ini hendaklah tertakluk kepada peruntukan undang-undang kecil 57 dan 58.

BAHAGIAN V

ORGANISASI DAN PENGURUSAN KOPERASI

24. (1) Tertakluk kepada peruntukan-peruntukan Akta, Peraturan dan Undang-undang Kecil, kuasa tertinggi bagi Koperasi ini hendaklah terletak kepada mesyuarat agung perwakilan mengikut seksyen 36 Akta. Di dalam mesyuarat ini, setiap perwakilan yang layak di bawah Undang-undang Kecil ini berhak hadir dan mempunyai satu undi.

**Mesyuarat
agung
perwakilan.**

(2) Mesyuarat agung perwakilan hendaklah terbahagi kepada tiga jenis iaitu mesyuarat agung perwakilan pertama, mesyuarat agung perwakilan tahunan dan mesyuarat agung perwakilan khas.

25. (1) Bagi maksud seksyen 37 Akta, Lembaga boleh menentukan kawasan-kawasan mesyuarat dan memanggil satu mesyuarat agung di tiap-tiap kawasan untuk memilih perwakilan ke mesyuarat agung perwakilan. Setiap kawasan hendaklah mempunyai sekurang-kurangnya dua puluh anggota.

**Pemilihan
perwakilan
dan urusan
mesyuarat
agung
kawasan.**

(2) Bilangan perwakilan yang dipilih bagi sesuatu kawasan hendaklah mengikut nisbah anggota seperti berikut:

- (a) bagi tiap-tiap dua puluh orang anggota yang pertama seorang perwakilan;
- (b) tiap-tiap tambahan dua puluh orang anggota berikutnya seorang perwakilan; dan
- (c) jumlah perwakilan-perwakilan bagi sesuatu kawasan hendaklah tidak melebihi empat puluh orang.

(3) Lembaga hendaklah memberi notis sekurang-kurangnya lima belas hari kepada semua anggota yang tinggal di dalam sesuatu kawasan sebelum mesyuarat agung kawasan diadakan dan notis itu hendaklah menyatakan tarikh, masa, tempat dan agenda mesyuarat. Notis ini hendaklah disampaikan berasingan melalui pos atau dengan cara lain yang munasabah, mengikut keputusan Lembaga kepada tiap-tiap anggota di alamatnya yang terakhir didaftarkan di pejabat Koperasi ini atau disiarkan di dalam satu atau lebih media massa.

(4) Hanya anggota-anggota yang telah menjelaskan bayaran menurut undang-undang kecil 15 pada dua belas bulan sebelum tarikh mesyuarat agung kawasan, berhak menerima notis untuk menghadiri mesyuarat agung kawasan dan berhak mempunyai satu undi dan layak menjadi seorang perwakilan ke sesuatu mesyuarat agung perwakilan.

(5) Seorang perwakilan akan kekal menjadi perwakilan selagi dia menjadi anggota, sehingga mesyuarat agung kawasan yang akan datang untuk memilih perwakilan-perwakilan baru. Sekiranya perwakilan itu berhenti menjadi anggota atau menarik diri menjadi perwakilan, maka hilanglah hak perwakilan kawasan yang berkenaan.

(6) Kuorum bagi mengadakan mesyuarat agung kawasan hendaklah satu pertiga atau dua puluh daripada jumlah anggota yang layak menerima notis mesyuarat dalam kawasan yang berkenaan itu mengikut mana yang kurang. Sekiranya dalam masa tiga puluh minit selepas waktu yang ditetapkan bagi mesyuarat itu bilangan anggota-anggota yang hadir belum cukup, maka mesyuarat itu hendaklah dibatalkan. Lembaga kemudiannya hendaklah memanggil satu mesyuarat lain dengan memberi notis seperti yang diperuntukkan di dalam fasal (3) undang-undang kecil ini. Sekiranya dalam masa tiga puluh minit selepas masa yang ditetapkan bagi mesyuarat ini, tidak hadir kuorum yang dikehendaki di bawah fasal ini, maka perwakilan tidaklah boleh dipilih dan hilanglah hak perwakilan kawasan itu.

(7) Anggota-anggota yang hadir dalam mesyuarat agung kawasan hendaklah memilih seorang pengerusi untuk mempengerusikan mesyuarat-mesyuarat dan seorang setiausaha untuk merekodkan segala butir-butir mesyuarat. Minit mesyuarat hendaklah ditandatangani oleh pengerusi dan setiausaha mesyuarat yang dipilih oleh anggota-anggota itu dan hendaklah dikirimkan kepada Lembaga dalam masa tujuh hari dari tarikh mesyuarat diadakan.

(8) Seseorang anggota tidak boleh melantik wakil untuk hadir atau mengundi bagi pihaknya dalam suatu mesyuarat agung kawasan.

(9) Seseorang anggota Lembaga atau seseorang anggota Jawatankuasa Audit Dalaman hendaklah dianggap sebagai seorang perwakilan dalam mesyuarat agung perwakilan. Seseorang anggota Lembaga atau seseorang anggota Jawatankuasa Audit Dalaman yang akan mengosongkan jawatan hendaklah tetap menjadi seorang perwakilan dalam mesyuarat agung perwakilan tahunan yang diadakan untuk memilih penggantinya sehingga tamatnya mesyuarat itu.

(10) Menurut subperaturan 15(1) Peraturan, mesyuarat agung kawasan hendaklah diadakan sekurang-kurangnya dua tahun sekali iaitu satu bulan sebelum mesyuarat agung perwakilan tahunan dan hendaklah menimbangankan perkara-perkara berikut:

- (a) ringkasan draf akaun atau akaun teraudit Koperasi jika ada;
- (b) belanjawan tahunan untuk dibentangkan di dalam mesyuarat agung perwakilan tahunan;
- (c) cadangan pindaan kepada Undang-undang Kecil dan aturan-aturan aktiviti, jika ada;
- (d) melantik perwakilan ke mesyuarat agung perwakilan; dan
- (e) usul daripada Lembaga dan anggota Koperasi, jika ada, yang diterima tujuh hari sebelum mesyuarat agung kawasan itu.

26. Menurut seksyen 38 Akta, mesyuarat agung perwakilan pertama hendaklah diadakan dalam tempoh tiga bulan selepas perakuan pendaftaran diterima oleh Koperasi.

Mesyuarat agung perwakilan pertama.

27. Mesyuarat agung perwakilan tahunan menurut seksyen 39 Akta, hendaklah diadakan tidak lewat daripada enam bulan selepas berakhirnya setiap tahun kewangan.

Mesyuarat agung perwakilan tahunan.

28. (1) Lembaga pada bila-bila masa boleh, dan apabila ada rekuisisi yang ditandatangani oleh sekurang-kurangnya satu perlima atau satu ratus perwakilan mengikut mana yang kurang hendaklah, memanggil suatu mesyuarat agung perwakilan khas mengikut subseksyen 40(1) Akta.

Mesyuarat agung perwakilan khas.

(2) Ketua Pendaftar atau mana-mana orang yang diberikuasa oleh Ketua Pendaftar menurut subseksyen 40(2) Akta, boleh memanggil pada bila-bila masa suatu mesyuarat agung perwakilan khas, mengikut cara dan pada masa dan di tempat yang diarahkannya, dan boleh menentukan perkara-perkara yang hendaklah dibincangkan oleh mesyuarat itu, dan mesyuarat itu hendaklah mempunyai segala kuasa dan tertakluk kepada kaedah-kaedah yang sama seperti mesyuarat agung yang dipanggil mengikut Akta atau Undang-undang Kecil ini.

29. (1) Notis bagi sesuatu mesyuarat agung perwakilan hendaklah diberi kepada perwakilan-perwakilan tidak kurang daripada lima belas hari sebelum diadakan mesyuarat agung perwakilan itu.

Notis mesyuarat agung perwakilan.

(2) Notis ini hendaklah menentukan tarikh, masa, tempat dan agenda mesyuarat dan bagi mesyuarat agung perwakilan tahunan menurut subseksyen 59(2) Akta, hendaklah disertakan dengan akaun-akaun dan kunci kira-kira Koperasi ini dan subsidiari atau subsidiari-subsidiarinya, jika ada, yang teraudit dengan sewajarnya, anggaran belanjawan bagi tahun yang akan datang, laporan Lembaga dan laporan Jawatankuasa Audit Dalaman dan dokumen-dokumen lain yang berkaitan. Satu salinan notis hendaklah dipamerkan di pejabat Koperasi ini dan sebagai tambahan boleh juga diterbitkan di dalam mana-mana akhbar tempatan.

(3) Bagi maksud seksyen 41 Akta, Lembaga hendaklah memberi kepada Ketua Pendaftar notis bertulis yang mengandungi maklumat tentang tarikh, masa, tempat dan agenda mesyuarat agung perwakilan yang akan diadakan oleh Koperasi tidak kurang daripada tiga puluh hari sebelum diadakan mesyuarat agung itu.

30. (1) Tertakluk kepada fasal (2) dan fasal (3) undang - undang kecil ini, kuorum bagi sesuatu mesyuarat agung perwakilan bagi apa-apa maksud adalah seperti ditetapkan di bawah Peraturan.

Kuorum mesyuarat agung perwakilan.

(2) Bagi sesuatu mesyuarat agung perwakilan khas di bawah fasal (2) undang-undang kecil 28 yang ditunda, apa-apa bilangan perwakilan yang tidak kurang daripada dua kali ganda bilangan anggota Lembaga yang hadir hendaklah dikira mencukupi kuorum akan tetapi keputusan-keputusan tidak boleh dibuat melainkan dengan kelebihan undi dua pertiga daripada perwakilan-perwakilan yang hadir dan layak mengundi sebagaimana yang diperuntukkan di bawah subperenggan 13(2)(b)(iii) Peraturan.

(3) Kuorum bagi mesyuarat agung perwakilan kerana meminda Undang-undang Kecil ini menurut subperaturan 6(1) Peraturan hendaklah dua pertiga dari jumlah perwakilan.

31.(1) Semua perbahasan kecuali yang berkaitan dengan pindaan Undang-undang Kecil hendaklah diputuskan dengan majoriti mudah undi perwakilan-perwakilan yang hadir sebagaimana di dalam daftar kehadiran. Jika undi sama banyak, maka usul yang diundi itu hendaklah disifatkan kalah. Perwakilan-perwakilan yang berkecuali dianggap tidak menyokong usul tersebut. Pengerusi mesyuarat tidak mempunyai undi pemutus sebagaimana yang dinyatakan di

Undi mesyuarat agung perwakilan.

bawah subseksyen 30(1) Akta.

(2) Menurut seksyen 30 Akta, dalam mana-mana mesyuarat agung perwakilan setiap perwakilan mempunyai satu undi. Undi berwakil tidak dibenarkan.

32. (1) Jika selepas tiga puluh minit daripada waktu yang ditetapkan bagi sesuatu mesyuarat agung perwakilan khas itu bilangan perwakilan yang hadir masih belum mencukupi kuorum, maka mesyuarat agung perwakilan khas itu —

**Tundaan
mesyuarat
agung
perwakilan.
khas.**

- (a) jika dipanggil oleh Lembaga atau atas permintaan perwakilan-perwakilan hendaklah dibatalkan; atau
- (b) jika dipanggil menurut subseksyen 40(2) Akta, hendaklah ditunda kepada satu tarikh lain tidak kurang daripada empat belas hari tetapi tidak lebih daripada tiga puluh hari dari tarikh yang ditetapkan dan notis mengenai penundaannya hendaklah diposkan dalam tempoh tujuh hari dari tarikh yang ditetapkan bagi mesyuarat itu.

(2) Perkara-perkara yang telah dicadangkan bagi mesyuarat agung yang ditunda hendaklah dibincangkan pada mesyuarat tertunda itu. Jika ada apa-apa perubahan dibuat kepada perkara-perkara yang telah dicadangkan itu, maka notis menurut fasal (1) undang-undang kecil 29 hendaklah diberi kepada tiap-tiap perwakilan bagi mesyuarat tertunda itu.

33. (1) Menurut peraturan 12 Peraturan, urusan-urusan berikut hendaklah dijalankan oleh mesyuarat agung perwakilan, iaitu —

**Perkara-
perkara yang
diputuskan
oleh
mesyuarat
agung
perwakilan.**

- (a) mengesahkan minit mesyuarat agung perwakilan tahunan yang terdahulu dan mana-mana mesyuarat agung perwakilan khas yang berselang;
- (b) menimbang laporan-laporan Lembaga dan Jawatankuasa Audit Dalam dan pandangan Ketua Pendaftar mengenai akaun-akaun teraudit dan laporan Lembaga Koperasi ini, (*jika pandangan Ketua Pendaftar yang berkaitan dengannya yang disebutkan di bawah subperaturan 30(1) dan (2) dan perenggan 59(1)(e) Akta belum lagi diterima oleh Koperasi, pandangan tersebut hendaklah dibentangkan di mesyuarat agung perwakilan tahunan berikutnya*);
- (c) menimbang dan meluluskan akaun-akaun teraudit Koperasi dan subsidiari atau subsidiari-subsidiarinya, jika ada, cadangan pembahagian keuntungan dan laporan juruaudit Koperasi ini;
- (d) memilih anggota-anggota Lembaga dan Jawatankuasa Audit Dalam;
- (e) menimbang dan meluluskan belanjawan tahunan bagi tahun kewangan yang akan datang;
- (f) meluluskan elaun-elaun kepada anggota-anggota Lembaga dan Jawatankuasa Audit Dalam dan saraan kepada anggota-anggota Lembaga yang dilantik sebagai pengarah bagi subsidiari atau subsidiari-subsidiari Koperasi ini, jika ada;
- (g) meluluskan suatu panel yang terdiri daripada tidak kurang daripada dua firma audit untuk dipilih salah satu daripadanya bagi mengaudit akaun-akaun Koperasi;

- (h) menimbang dan meluluskan skop dan had pelaburan daripada wang berlebihan Koperasi ini;
- (i) menetapkan had maksimum keterhutangan Koperasi ini;
- (j) melantik suatu jawatankuasa yang terdiri daripada enam orang perwakilan dan empat orang anggota Lembaga untuk menentusahkan draf minit mesyuarat agung perwakilan tahunan itu;
- (k) mengisytihar atau menerbitkan syer-syer bonus;
- (l) mendengar, menimbang atau memutuskan apa-apa urusan lain Koperasi ini yang baginya suatu notis tidak kurang daripada tujuh hari telah diberikan;
- (m) menimbang dan meluluskan apa-apa cadangan pindaan kepada Undang-undang Kecil Koperasi ini;
- (n) mendengar dan memutuskan apa-apa aduan daripada mana-mana anggota yang terkilang dengan sesuatu keputusan Lembaga, dengan syarat suatu notis yang tidak kurang daripada tujuh hari telah diberikan kepada Koperasi mengenainya;
- (o) meluluskan apa-apa perbelanjaan bagi perlantikan orang-orang yang kompeten bagi membantu Jawatankuasa Audit Dalam; dan
- (p) menimbang dan meluluskan apa-apa laporan yang hendak dikemukakan menurut kehendak Akta dan Peraturan.

(2) Perkara-perkara di dalam perenggan (a),(b),(c),(d) dan (e) fasal (1) undang-undang kecil ini hendaklah diputuskan di dalam mesyuarat agung perwakilan tahunan.

(3) Minit bagi sesuatu mesyuarat agung perwakilan hendaklah dicatatkan di dalam buku minit mesyuarat yang berkenaan dan satu salinannya hendaklah diserahkan kepada Ketua Pendaftar dalam masa tiga puluh hari selepas tarikh mesyuarat agung perwakilan itu, menurut perenggan 14(b) Akta.

34. (1) Seorang perwakilan atau anggota Lembaga yang dipilih oleh majlis hendaklah mempengerusikan mesyuarat agung perwakilan itu.

Pengerusi mesyuarat agung perwakilan.

(2) Pengerusi dengan persetujuan mesyuarat bolehlah dan, jika dikehendaki demikian oleh mesyuarat itu, hendaklah menanggungkan mesyuarat agung perwakilan itu dari satu masa ke satu masa yang lain dan dari satu tempat ke satu tempat yang lain dalam kawasan operasi Koperasi tetapi mesyuarat yang ditanggungkan itu tidak boleh menjalankan apa-apa urusan lain selain daripada urusan mesyuarat yang asal. Notis tidaklah perlu bagi mesyuarat yang ditanggungkan itu.

35. Pengelolaan hal-ehwal Koperasi ini menurut perenggan 42(a) Akta, hendaklah terserah kepada satu Lembaga yang mengandungi sembilan orang yang terdiri daripada perwakilan-perwakilan yang dipilih oleh mesyuarat agung perwakilan menurut perenggan (d) fasal (1) undang-undang kecil 33 dan undang-undang kecil 37.

Pengelolaan Koperasi dan pengurusan.

36. Seseorang perwakilan tidak layak untuk dipilih menjadi anggota Lembaga, menurut seksyen 43 Akta, jika dia —

**Ketaklayakan
menjadi anggota
Lembaga.**

- (a) telah disabitkan atas suatu kesalahan di bawah Akta; atau
- (b) telah dipecat sebagai pekerja sesuatu koperasi berdaftar; atau
- (c) telah dilantik sebagai anggota Jawatankuasa Audit Dalaman bagi Koperasi ini; atau
- (d) ada kepentingan diri dalam mana-mana aktiviti yang diusahakan oleh Koperasi ini; atau
- (e) selepas dua tahun Koperasi didaftarkan, belum genap tempoh dua tahun menjadi anggota Koperasi ini.

37. (1) Satu pertiga daripada bilangan anggota Lembaga yang dipilih di bawah undang-undang kecil 35 hendaklah menurut peraturan 16 Peraturan, mengosongkan jawatan mereka secara bergilir-gilir pada tiap-tiap mesyuarat agung perwakilan tahunan. Bagi dua tahun yang pertama, anggota-anggota Lembaga yang akan berhenti hendaklah dipilih secara mencabut undi. Mana-mana anggota yang mengosongkan jawatannya di bawah Undang-undang Kecil ini boleh dilantik semula.

**Tempoh
memegang
jawatan.**

(2) Mana-mana kekosongan dalam Lembaga hendaklah dalam tempoh enam puluh hari dari hari berlakunya kekosongan itu diisi oleh Lembaga dengan melantik mana-mana perwakilan yang berkelayakan menurut undang-undang kecil 36. Anggota yang dilantik demikian hendaklah berkhidmat sehingga mesyuarat agung perwakilan tahunan yang akan datang.

38. (1) Seseorang anggota Lembaga akan lucut jawatannya dengan serta-merta jika dia —

**Lucut dan
penggantungan
jawatan.**

- (a) disabitkan atas kesalahan boleh daftar atau kesalahan di bawah Akta atau Peraturan; atau
- (b) menerima apa-apa perlantikan tetap yang bergaji dalam Koperasi ini; atau
- (c) tidak hadir di dalam mesyuarat Lembaga tiga kali berturut-turut, melainkan dengan sebab-sebab yang boleh diterima oleh Lembaga yang telah dimaklumkan terlebih dahulu; atau
- (d) hilang kelayakan sebagai anggota menurut undang-undang kecil 19.

(2) Menurut subseksyen 47(1) Akta, seseorang anggota Lembaga hendaklah digantung dari jawatannya jika —

- (a) sesuatu langkah perbincangan diambil terhadap anggota itu mengenai sesuatu kesalahan boleh daftar atau sesuatu kesalahan di bawah Akta atau Peraturan; atau
- (b) majoriti anggota-anggota Lembaga berpuas hati bahawa anggota itu telah bertindak dengan cara yang memudaratkan kepentingan Koperasi ini menurut subperaturan 20(1) Peraturan.

(3) Tiap-tiap kes penggantungan di bawah perenggan (b) fasal (2) undang-undang kecil ini, hendaklah didengar oleh mesyuarat agung perwakilan yang terawal diadakan selepas penggantungan itu dan anggota yang digantung jawatannya oleh Lembaga itu hendaklah diberi kesempatan untuk memberi penjelasannya menurut subperaturan 20(4) Peraturan, dan hendaklah tertakluk kepada pengesahan atau pengetepian oleh majoriti perwakilan-perwakilan yang hadir di dalam mesyuarat agung itu menurut subperaturan 20(3) Peraturan.

(4) Anggota yang dilucutkan atau digantung jawatannya hendaklah dengan serta-merta diberitahu secara bertulis dan, menurut subperaturan 20(2) Peraturan, hendaklah dengan segera berhenti daripada menjalankan segala hak dalam pengurusan atau pentadbiran hal-ehwal Koperasi ini.

39. (1) Walau apa pun peruntukan fasal (1) undang-undang kecil 37, mesyuarat agung perwakilan hendaklah mempunyai kuasa menurut subperaturan 16(2) Peraturan, untuk menamatkan perlantikan mana-mana anggota Lembaga yang dipilih di bawah undang-undang kecil 35 daripada jawatannya pada bila-bila masa dan memilih gantinya atau menamatkan perlantikan kesemua anggota Lembaga itu dan memilih anggota-anggota Lembaga yang baru dengan syarat bahawa usul secara bertulis untuk menamatkan perlantikan anggota Lembaga itu hendaklah disampaikan kepada Koperasi sekurang-kurangnya tujuh hari sebelum mesyuarat agung perwakilan itu diadakan.

**Menamatkan
perlantikan oleh
mesyuarat agung
perwakilan.**

(2) Keputusan untuk menamatkan perlantikan seseorang atau kesemua anggota Lembaga hanya boleh dibuat selepas mesyuarat agung perwakilan itu mendengar penjelasan anggota atau anggota-anggota yang terlibat.

(3) Anggota Lembaga yang ditamatkan perlantikannya di bawah undang-undang kecil ini tidak boleh dilantik semula sehingga mesyuarat agung perwakilan tahunan yang akan datang.

40. (1) Mesyuarat Lembaga yang pertama selepas mesyuarat agung perwakilan tahunan hendaklah diadakan sebaik sahaja selesai mesyuarat agung itu.

**Mesyuarat
Lembaga.**

(2) Mesyuarat Lembaga yang berikutnya hendaklah diadakan sekurang-kurangnya sekali dalam tempoh tiga bulan.

(3) Mesyuarat Lembaga hendaklah juga diadakan sekiranya Ketua Pendaftar mengeluarkan arahan atau jika lima orang anggota Lembaga membuat permintaan dengan bertulis menyatakan perkara-perkara yang hendak dibincangkan.

41. Kuorum bagi mesyuarat Lembaga hendaklah lima orang.

**Kuorum
mesyuarat
Lembaga.**

42. Urusan-urusan mesyuarat Lembaga hendaklah termasuk —

**Urusan
mesyuarat
Lembaga.**

(a) mengesahkan minit mesyuarat yang lalu;

(b) membincangkan perkara-perkara berbangkit;

(c) mengkaji, membincang, menimbang dan di mana berkenaan, memutuskan perkara-perkara berikut:

- (i) keputusan-keputusan mesyuarat agung dan menentukan tindakan-tindakan;
 - (ii) laporan Jawatankuasa Audit Dalaman;
 - (iii) laporan pengurusan termasuk pengurusan buku-buku;
 - (iv) permohonan menjadi anggota Koperasi;
 - (v) permohonan berhenti daripada menjadi anggota;
 - (vi) permohonan pinjaman daripada anggota-anggota dan kakitangan;
 - (vii) permohonan menambah atau mengurangkan ansuran pinjaman;
 - (viii) permohonan menambah atau mengurangkan caruman yuran atau syer;
- (d) membentang dan meluluskan akaun kewangan bulanan;
- (e) mengkaji projek-projek Koperasi yang lama dan yang sedang dilaksanakan
- (f) mengkaji, membincang dan memutuskan cadangan projek-projek baru;
- (g) mengkaji dan membincangkan —
- (i) perkara-perkara perjawatan;
 - (ii) program latihan pekerja;
 - (iii) program pendidikan anggota-anggota; dan
- (h) menjalankan apa-apa urusan lain yang baginya notis tidak kurang daripada tujuh hari telah diberikan.

43. (1) Semua usul dan cadangan hendaklah diputuskan dengan majoriti mudah undi anggota-anggota Lembaga yang hadir. Jika undi sama banyak, maka usul atau cadangan yang diundi itu hendaklah disifatkan kalah atau gugur.

**Undi anggota
Lembaga.**

(2) Seseorang anggota Lembaga tidak boleh mengundi dalam mana-mana perkara mengenai dirinya sendiri atau perkara yang di dalamnya ia ada kepentingan peribadi. Seseorang anggota Lembaga yang ada kepentingan peribadi dalam apa-apa perkara yang akan dipertimbangkan oleh mesyuarat hendaklah mengisytiharkan sepenuhnya kepada Lembaga mengenai penglibatan atau kepentingan dirinya dalam perkara itu.

44. (1) Segala keputusan mesyuarat Lembaga hendaklah dalam tempoh tujuh hari dicatatkan dalam buku minit mesyuarat yang berkenaan dan ditandatangani oleh setiausaha mesyuarat itu dan hendaklah dalam tempoh empat belas hari dikelilingkan kepada anggota-anggota Lembaga. Minit-minit itu setelah disahkan dalam mesyuarat yang berikutnya hendaklah ditandatangani pula oleh pengerusi mesyuarat itu.

**Buku minit
mesyuarat
Lembaga.**

(2) Minit bagi sesuatu mesyuarat Lembaga hendaklah diserahkan kepada Ketua Pendaftar tidak lewat daripada tiga puluh hari selepas tarikh mesyuarat itu, menurut perenggan 14(b) Akta.

45. (1) Menurut seksyen 44 Akta, Lembaga pada umumnya adalah bertanggungjawab untuk memastikan pentadbiran serta pengurusan Koperasi dikendalikan dengan teratur.

**Kuasa dan
kewajipan
Lembaga.**

(2) Bagi melaksanakan tanggungjawab di bawah fasal (1) itu Lembaga hendaklah mempunyai kuasa-kuasa dan kewajipan-kewajipan yang berikut:

- (a) melantik di antara anggota-anggotanya di dalam mesyuarat Lembaga yang diadakan di bawah fasal (1) undang-undang kecil 40, seorang pengerusi, seorang setiausaha dan seorang bendahari;
- (b) mengemukakan kepada Ketua Pendaftar suatu senarai anggota Lembaga yang mengandungi butir-butir seperti nama, alamat kediaman, nombor kad pengenalan, tarikh keanggotaan dan pekerjaan mengikut perenggan 14(a) Akta, dan memberitahu Ketua Pendaftar apa-apa perubahan tentang butir-butir berkenaan secara bertulis dalam tempoh lima belas hari dari tarikh berlakunya perubahan tersebut;
- (c) menerima masuk anggota-anggota baru;
- (d) meluluskan dan mengesahkan pemindahan dan penebusan syer-syer;
- (e) jika perlu, melantik seorang pegawai yang bergaji tetap atau sebuah firma bagi menjalankan sebahagian daripada kewajipan setiausaha, disyaratkan pegawai yang dilantik itu tidak boleh menjadi anggota Lembaga;
- (f) menyenggara dengan benar dan betulnya semua akaun bagi semua wang yang diterima dan yang dibelanjakan atas nama Koperasi;
- (g) menyenggara dengan betulnya semua akaun berkenaan dengan aset-aset dan liabiliti-liabiliti Koperasi;
- (h) membenarkan perbelanjaan-perbelanjaan dan menyemak serta mengawasi supaya semua akaun, buku daftar dan dokumen Koperasi yang disenggarakan itu diuruskan dengan sempurna dan dikemaskinikan;
- (i) membentangkan kepada mesyuarat agung perwakilan tahunan akaun perdagangan, akaun untung rugi, penyata sumber-sumber dan penggunaan wang serta kunci kira-kira, laporan Lembaga berkenaan dengan kedudukan hal-ehwal Koperasi serta subsidiari atau subsidiari-subsidiarinya yang telah dikemukakan untuk pandangan Ketua Pendaftar serta laporan juruaudit;
- (j) membuat perakuan kepada mesyuarat agung perwakilan tahunan mengenai pembahagian keuntungan atau pengisytiharan syer bonus Koperasi;
- (k) menimbangkan penyata-penyata dan surat-surat arahan Ketua Pendaftar atau wakilnya dan mengambil tindakan-tindakan yang sewajar ke atasnya;
- (l) memenuhi jawatan-jawatan kosong yang berlaku di dalam Lembaga, menggantung keanggotaan anggota-anggota dan anggota Lembaga serta melucutkan jawatan-jawatan anggota Lembaga;
- (m) memanggil mesyuarat agung perwakilan dan kawasan mengikut Undang-

undang Kecil;

- (n) membuat perjanjian bagi mendapatkan pinjaman-pinjaman tertakluk kepada kelulusan mesyuarat agung perwakilan;
- (o) dengan mengeluarkan surat-surat rasmi, melantik, menggantung, membuang kerja, menetapkan kewajipan pekerja-pekerja termasuk pengurus, menetapkan gaji dan bayaran-bayaran lain bagi mereka dan mendapatkan jaminan yang cukup bagi kesempurnaan menjalankan kewajipan mereka;
- (p) bertindak atas nama dan bagi pihak Koperasi bagi menyelesaikan segala pertikaian mengenai urusan Koperasi ini atau menerusi seseorang yang dilantik secara bertulis menjalankan atau memberhentikan mana-mana tindakan mahkamah;
- (q) melabur wang berlebihan menurut keputusan mesyuarat agung perwakilan dan tertakluk kepada peruntukan Akta dan Peraturan;
- (r) mengkaji dan merancang projek-projek yang difikirkan akan memberi manfaat kepada anggota-anggota dan melaksanakan projek-projek itu mengikut keputusan mesyuarat agung perwakilan di mana perlu;
- (s) menjalankan rancangan-rancangan atau projek-projek dan mempelawa anggota-anggota Koperasi ini mengambil bahagian dengan menyumbangkan modal tambahan atau simpanan khas sebagaimana yang dipersetujui;
- (t) mengikat perjanjian atau memberi indemniti bagi pihak Koperasi yang mana hendaklah dimeteraikan dengan mohor Koperasi dan ditandatangani oleh pengerusi, setiausaha dan bendahari atau seperti yang ditetapkan oleh Lembaga;
- (u) melantik di antara anggota-anggotanya bagi menghadiri mesyuarat mana-mana koperasi yang Koperasi ini menjadi anggotanya;
- (v) menubuhkan apa-apa jawatankuasa jika perlu, bagi menjalankan dengan sempurnanya mana-mana aktiviti Koperasi dan mewakilkan kuasa kepadanya dari semasa ke semasa mengikut keputusan Lembaga;
- (w) membuat aturan-aturan aktiviti dari semasa ke semasa bagi kesempurnaan pelaksanaan apa-apa aktiviti Koperasi dengan kelulusan mesyuarat agung perwakilan dan mengemukakan satu salinan kepada Ketua Pendaftar ;
- (x) mencadangkan dengan secara dibutirkan satu persatu kepada mesyuarat agung perwakilan elaun-elaun kepada anggota-anggota Lembaga dan Jawatankuasa Audit Dalaman dan saraan kepada anggota-anggota Lembaga yang dilantik sebagai pengarah bagi subsidiari atau subsidiari-subsidiari Koperasi, jika ada; dan
- (y) melaksanakan kewajipan-kewajipan lain yang perlu sebagaimana yang ditentukan di dalam Akta, Peraturan, Undang-undang Kecil dan mesyuarat agung perwakilan.

46. Menurut seksyen 45 Akta, Lembaga hendaklah berhemat dan bertekun seperti ahli-ahli perniagaan yang biasa dan hendaklah bertanggung secara bersesama dan berasingan bagi apa-apa kerugian yang ditanggung oleh Koperasi oleh sebab kegagalan mereka berhemat dan bertekun sedemikian atau oleh sebab apa-apa perbuatan yang bertentangan dengan peruntukan-peruntukan Akta, Peraturan, Undang-undang Kecil ini serta aturan-aturan aktiviti yang dibuat di bawahnya atau arahan mesyuarat agungnya.

**Liabiliti
anggota
Lembaga.**

47. Pengerusi hendaklah menjalankan kewajipan-kewajipan yang berikut:

**Kewajipan
pengerusi.**

- (a) mempengerusikan semua mesyuarat Lembaga;
- (b) menandatangani minit mesyuarat yang disahkan;
- (c) memanggil sendiri atau melalui setiausaha, mesyuarat-mesyuarat Lembaga bila-bila perlu;
- (d) mengarahkan Jawatankuasa Audit Dalaman supaya mengaudit akaun Koperasi pada bila-bila masa dan melaporkan kepadanya;
- (e) menandatangani bersama dua anggota Lembaga permohonan bagi didaftarkan pindaan kepada Undang-undang Kecil dan dokumen-dokumen lain yang berkaitan; dan
- (g) menyelia secara am pentadbiran, hal ehwal dan pekerja Koperasi ini.

48. (1) Setiausaha hendaklah menjalankan kewajipan-kewajipan yang berikut:

**Kewajipan
setiausaha.**

- (a) memanggil dan menghadiri mesyuarat agung perwakilan, mesyuarat-mesyuarat Lembaga dan mesyuarat-mesyuarat jawatankuasa dan menyampaikan segala laporan dan dokumen untuk pertimbangan mesyuarat-mesyuarat itu;
- (b) merekodkan perjalanan dan meminitkan keputusan sesuatu mesyuarat;
- (c) menyenggarakan dengan betul dan mengemaskinikan semua daftar anggota, daftar penama, buku-buku dan laporan-laporan yang dikehendaki oleh Lembaga;
- (d) menjalankan kerja-kerja surat-menyurat sebagaimana yang diarahkan oleh Lembaga;
- (e) mengesahkan dan memperakui segala perkara yang bertulis di dalam buku-buku, cabutan-cabutan dan salinan-salinan dari rekod-rekod Koperasi melalui satu akuan yang ditarik dan ditandatangani menurut peraturan 9 Peraturan Koperasi;
- (f) menyimpan dan menjaga dengan selamatnya mohor Koperasi; dan
- (g) menjalankan apa-apa tugas lain yang ditentukan oleh Lembaga ke atasnya dari semasa ke semasa.

(2) Kewajipan setiausaha di bawah fasal (1), kecuali yang dinyatakan di perenggan-perenggan (a), (b), (e) dan (f) undang-undang kecil ini, bolehlah diwakilkan kepada pengurus jika seorang pengurus telah dilantik.

49. (1) Bendahari hendaklah menjalankan kewajipan-kewajipan yang berikut:

**Kewajipan
bendahari.**

- (a) mengendalikannya segala urusan perdagangan dan perindustrian Koperasi mengikut dasar yang ditetapkan oleh Lembaga;
- (b) mengawasi kecekapan, tatatertib dan daya usaha semua pegawai dan pekerja Koperasi dalam menunaikan tugas-tugas dan tanggungjawab mereka;
- (c) menerima dan menjaga semua wang yang diterima oleh Koperasi dan membuat pembayaran mengikut arahan-arahan Lembaga;
- (d) menyimpan ke dalam bank atas nama Koperasi semua wang yang diterima dalam masa dua puluh empat jam daripada penerimaannya;
- (e) mengeluarkan resit-resit, menyediakan baucar-baucar dan surat-surat lain mengikut arahan-arahan Lembaga;
- (f) menyimpan dalam Akaun Wang Runcit, wang sebanyak yang diluluskan oleh Lembaga untuk memenuhi perbelanjaan runcit dan perbelanjaan yang dibuat daripada akaun ini boleh diganti seberapa kerap yang perlu;
- (g) menyenggara dan menyimpan akaun-akaun Koperasi dan menyediakan segala-galanya dengan sempurna dan kemaskini supaya dapat diperiksa pada bila-bila masa oleh pihak berkuasa yang berkenaan;
- (h) menyediakan akaun tahunan dan laporan tahunan Koperasi untuk dibentangkan dalam mesyuarat Lembaga;
- (i) menyediakan anggaran belanjawan tahunan Koperasi dalam bentuk yang menyatakan dengan jelas segala butiran pendapatan dan perbelanjaan untuk ditimbang oleh Lembaga sebelum dibentangkan kepada mesyuarat agung perwakilan; dan
- (j) menyediakan penyata pendapatan dan perbelanjaan Koperasi yang benar dengan secara dibuktikan satu persatu bagi sesuatu tempoh sebagaimana yang dikehendaki oleh Lembaga untuk dibandingkan dengan anggaran bagi tempoh berkenaan yang telah diluluskan oleh mesyuarat agung perwakilan.

(2) Mana-mana satu atau lebih daripada kewajipan-kewajipan bendahari itu bolehlah, tertakluk kepada persetujuan Lembaga, diamanahkan kepada pengurus sekiranya seorang pengurus dilantik oleh Koperasi.

50. Jawatankuasa Audit Dalam Koperasi ini menurut perenggan 42(b) Akta hendaklah mengandungi tiga orang, terdiri daripada perwakilan-perwakilan yang dipilih oleh mesyuarat agung perwakilan tahunan menurut perenggan (d) fasal (1) undang-undang kecil 33.

**Jawatankuasa
Audit
Dalam.**

51. Seseorang perwakilan tidak layak untuk dipilih menjadi anggota

**Ketaklayakan
menjadi**

Jawatankuasa Audit Dalaman menurut seksyen 43 Akta, jika dia —

**Jawatankuasa
Audit
Dalaman.**

- (a) telah disabitkan atas suatu kesalahan di bawah Akta; atau
- (b) telah dipecat sebagai pekerja mana-mana koperasi; atau
- (c) telah menjadi anggota Lembaga Koperasi ini.

52. (1) Semua anggota Jawatankuasa Audit Dalaman ini hendaklah berhenti pada tiap-tiap mesyuarat agung perwakilan tahunan.

**Tempoh
memegang
jawatan.**

(2) Kekosongan dalam Jawatankuasa Audit Dalaman hendaklah dalam tempoh enam puluh hari dari tarikh pengosongan jawatan diisi oleh jawatankuasa ini dengan melantik mana-mana perwakilan yang layak.

53. (1) Jawatankuasa Audit Dalaman hendaklah mempunyai kuasa yang diberi di bawah seksyen 49 Akta, untuk memeriksa segala rekod perakaunan dan rekod lain yang berhubungan secara langsung atau tidak langsung dengan Koperasi ini dan subsidiari atau subsidiari-subsidiarinya bagi memastikan hal-ehwal Koperasi dijalankan mengikut matlamat penubuhan, Undang-undang Kecil serta keputusan mesyuarat agung.

**Kuasa dan
kewajipan
Jawatan-
kuasa Audit
Dalaman.**

(2) Jawatankuasa Audit Dalaman hendaklah —

- (a) memastikan adanya kuasa dan keesahan bagi segala perbelanjaan;
- (b) memeriksa akaun-akaun Koperasi atau melantik orang-orang yang kompeten untuk memeriksa akaun-akaun itu pada lat-lat masa yang tetap yang tidak boleh kurang daripada sekali dalam tempoh tiga bulan;
- (c) memberitahu Lembaga apa-apa ketakselarasan yang berlaku dalam pengurusan Koperasi ini dengan serta-merta;
- (d) mengemukakan kepada mesyuarat agung perwakilan tahunan, laporan mengenai pengurusan dan hal ehwal Koperasi ini termasuk pelanggaran terhadap Akta atau Peraturan atau Undang-undang Kecil; dan
- (e) pada setiap masa, mempunyai akses kepada segala buku, akaun dan dokumen Koperasi ini dan mana-mana orang yang dikehendakinya supaya mengemukakan apa-apa maklumat atau buku-buku, akaun-akaun dan dokumen-dokumen sedemikian hendaklah mematuhi kehendak itu.

(3) Segala kos dan perbelanjaan yang dilakukan oleh Jawatankuasa ini dalam menjalankan tugas-tugas, fungsi-fungsi serta tanggungjawabnya hendaklah ditanggung oleh Koperasi.

(4) Jawatankuasa Audit Dalaman menurut subperaturan 32(2) Peraturan hendaklah bersidang dan membuat syornya kepada Lembaga tidak kurang daripada dua kali tiap-tiap tahun dan laporan-laporan hendaklah dikemukakan kepada Ketua Pendaftar.

BAHAGIAN VI

ASET DAN WANG KOPERASI

54. (1) Kumpulan wang koperasi ini, menurut seksyen 50 Akta, mengandungi -
- (a) syer dan yuran anggota;
 - (b) simpanan khas daripada anggota-anggota;
 - (c) pinjaman daripada anggota dan bukan anggota;
 - (d) Kumpulan Wang Rizab;
 - (e) Akaun Rizab Modal;
 - (f) Kumpulan Wang Penebusan Syer;
 - (g) derma dan pemberian tertentu;
 - (h) baki keuntungan terkumpul; dan
 - (i) kumpulan wang lain yang diluluskan oleh mesyuarat agung perwakilan.
- (2) Kumpulan wang Koperasi ini selain daripada Kumpulan Wang Rizab bolehlah digunakan bagi melaksanakan aktiviti-aktiviti yang diperuntukkan di bawah fasal (1) undang-undang kecil 8.
55. (1) Bagi maksud perenggan 50(b) Akta, setiap anggota hendaklah melanggan seratus ringgit syer sebagai sumbangan minimum yang hendaklah dijelaskan dalam tempoh lima bulan dan tidak boleh dikeluarkan kecuali selepas keanggotaan anggota itu tamat.
- (2) Seseorang penama atau wasi yang menyambung keanggotaan anggota yang mati hendaklah mengambil jumlah syer yang dimiliki oleh anggota yang digantikannya itu tertakluk kepada had yang ditetapkan di bawah fasal (3) undang-undang kecil ini.
- (3) Pemilikan syer seseorang anggota dalam modal Koperasi ini menurut seksyen 33 Akta tidaklah boleh melebihi satu perlima daripada jumlahnya pada bila-bila masa.
56. Yuran bulanan anggota seperti yang diperuntukkan di bawah perenggan 50(c) Akta hendaklah sekurang-kurangnya dua puluh ringgit sebulan. Tiap-tiap anggota adalah diminta untuk membuat bayaran yuran yang lebih mengikut aturan jimat-cermat dan pinjam-meminjam yang dibuat oleh Lembaga dengan kelulusan mesyuarat agung perwakilan.
57. Seseorang anggota boleh memindahkan kepada anggota-anggota lain syer-

Wang dan kumpulan wang Koperasi.

Modal syer.

Yuran.

Pindahan syer.

syernya yang melebihi sumbangan minimum di bawah fasal (1) undang-undang kecil 55, akan tetapi pindahan tersebut tidak akan berkuatkuasa sehingga borang pemindahan telah ditandatangani oleh anggota lain itu dan didaftarkan oleh Koperasi. Syer-syer seseorang anggota yang mati bolehlah dipindahkan kepada penama atau wasinya apabila penama atau wasi itu disahkan menjadi anggota atau kepada sesiapa yang dinamakan oleh penama atau wasi itu dalam masa enam bulan selepas kematian anggota itu, sepertimana yang diperuntukkan di bawah seksyen 24 Akta.

58. (1) Jika bagi seseorang anggota yang tamat keanggotaannya oleh apa-apa sebab jua pun pemindahan tidak dapat dibuat menurut undang-undang kecil 57, maka syer-syernya yang diperihalkan di dalam undang-undang kecil itu bolehlah ditebus oleh Koperasi tertakluk kepada fasal (2) undang-undang kecil ini.

Penyelesaian modal syer.

(2) Syer-syer boleh ditebus hanya dari Kumpulan Wang Penebusan Syer. Nilai tebusan syer-syer ini hendaklah mengikut sebagaimana yang ditunjukkan dalam akaun teraudit terakhir bagi Koperasi ini akan tetapi tidaklah boleh melebihi nilai asalnya.

(3) Syer-syer yang ditebus di bawah fasal (1) undang-undang kecil ini bolehlah, jika diluluskan oleh mesyuarat agung perwakilan, diterbitkan semula sebagai syer bonus.

59. (1) Menurut seksyen 55 Akta semua keuntungan modal yang diperolehi daripada —

Keuntungan modal.

- (a) penjualan tanah atau bangunan, atau kedua-duanya sebagai aset tetap; dan
- (b) penilaian semula tanah atau bangunan, atau kedua-duanya, sebagai aset tetap, dengan kelulusan Ketua Pendaftar;

hendaklah dikreditkan ke Akaun Rizab Modal.

(2) Keuntungan modal yang disebutkan di dalam perenggan (a) fasal (1) undang-undang kecil ini bolehlah, jika diluluskan oleh mesyuarat agung perwakilan, digunakan bagi semua atau mana-mana maksud yang berikut:

- (a) penerbitan syer bonus;
- (b) penghapusan kira kerugian terkumpul;
- (c) penghapusan kira kerugian modal; dan
- (d) pewujudan suatu Kumpulan Wang Penebusan Syer Bonus.

(3) Syer bonus boleh diterbitkan menurut tatacara di bawah peraturan 25 Peraturan berasaskan kepada jumlah syer yang dipegang oleh tiap-tiap anggota pada masa dua belas bulan sebelum tarikh pengisytiharan syer bonus itu dan dalam hal penerbitan semula daripada syer bonus yang ditebus semula, dua belas bulan sebelum tarikh pengisytiharan itu, dengan syarat —

- (a) nama anggota yang akan menerima itu ada dalam daftar Koperasi pada tarikh pengisytiharan syer bonus itu;
- (b) semua kerugian terkumpul dan semasa telah dihapus kira;

- (c) buku-buku dan rekod-rekod Koperasi telah disenggarakan dengan memuaskan menurut pandangan Ketua Pendaftar.
- (4) Syer bonus tidak boleh dikeluarkan tetapi boleh, dengan kelulusan Lembaga, dipindahkan kepada anggota lain atau, dalam hal anggota yang mati selepas syer bonus itu dikeluarkan, dibayar daripada Kumpulan Wang Penebusan Syer Bonus.
60. (1) Koperasi ini hendaklah mewujudkan dan menyenggarakan satu Kumpulan Wang Rizab menurut subseksyen 57(1) Akta yang kepadanya tidak kurang daripada lima belas peratus daripada keuntungan bersih terauditinya hendaklah dikreditkan. **Kumpulan Wang Rizab.**
- (2) Kumpulan Wang Rizab ini tidak boleh dibahagi-bahagikan dan tiada anggota yang berhak untuk menuntut apa-apa bahagian tertentu daripadanya.
61. Koperasi bolehlah menurut peruntukan perenggan 50(d) Akta, menerima simpanan khas tertakluk kepada terma-terma dan syarat-syarat yang dibuat mengikut fasal (4) undang-undang kecil 8. **Simpanan khas.**
62. (1) Tertakluk kepada kelulusan mesyuarat agung perwakilan, sebagaimana yang dinyatakan di bawah seksyen 52 Akta, Koperasi bolehlah meminjam wang daripada anggota dan bukan anggotanya untuk digunakan bagi maksud yang khas dalam perniagaannya. **Pinjaman luar.**
- (2) Koperasi ini hendaklah setiap tahun menentukan di dalam mesyuarat agung perwakilannya had maksimum keterhutangan berkenaan dengan pinjaman yang sedia ada dan yang baru yang akan ditanggung dalam tahun yang akan datang.
63. (1) Wang berlebihan Koperasi ini bolehlah dilabur atau didepositkan menurut peruntukan seksyen 54 Akta. **Pelaburan wang.**
- (2) Had maksimum yang boleh dilaburkan oleh Koperasi bagi sesuatu maksud hendaklah ditentukan oleh mesyuarat agung perwakilan.
64. Menurut subseksyen 51(1) Akta, Koperasi ini bolehlah memberikan apa-apa pinjaman atau kemudahan kredit lain kepada — **Pemberian pinjaman oleh Koperasi.**
- (a) anggota-anggotanya, tertakluk kepada terma-terma dan syarat-syarat yang ditetapkan dalam aturan-aturan yang diluluskan oleh mesyuarat agung perwakilan;
- (b) pekerja-pekerjanya, tertakluk kepada terma-terma dan syarat-syarat gunakhidmat mereka dan peruntukan peraturan 21 Peraturan;
- (c) subsidiari atau subsidiari-subsiarinya atau koperasi berdaftar lain, tertakluk kepada kelulusan Ketua Pendaftar.
65. (1) Keuntungan bersih teraudit Koperasi ini seperti yang ditunjukkan dalam akaun untung rugi menurut seksyen 56 Akta hendaklah diagihkan menurut subseksyen 57(1) dan (2) Akta seperti berikut: **Pengagihan untung bersih teraudit.**
- (a) tidak kurang daripada lima belas peratus dibayar kepada Kumpulan

Wang Rizab; dan

- (b) sebanyak mana yang ditentukan dari semasa ke semasa oleh Menteri dibayar kepada Kumpulan Wang Amanah Pendidikan Koperasi dan Kumpulan Wang Amanah Pembangunan Koperasi;

disyaratkan bahawa menurut subseksyen 57(4) Akta, bolehlah ditolak apa-apa bayaran yang dibuat menurut perenggan (b) daripada jumlah wang yang disebutkan di dalam perenggan (a).

(2) Selepas pengagihan mengikut fasal (1) undang-undang kecil ini, dan peruntukan cukai pendapatan jika ada, baki untung bersih teraudit, termasuk baki keuntungan yang belum dibahagi-bahagikan menurut subseksyen 57(5) Akta bolehlah digunakan bagi semua atau mana-mana maksud yang berikut:

- (a) potongan kerana langganan;
- (b) pulangan atas simpanan khas;
- (c) dividen atas syer atau yuran atau kedua-duanya;
- (d) bayaran honorarium kepada anggota Lembaga;
- (e) peruntukan sebanyak tidak lebih sepuluh peratus daripada untung bersih teraudit bagi apa-apa maksud kebajikan yang diluluskan oleh mesyuarat agung perwakilan; dan
- (f) peruntukan kepada kumpulan wang lain yang diwujudkan menurut fasal (1) undang-undang kecil 54.

(3) Menurut subseksyen 57(7) Akta, bayaran kepada perkara-perkara di bawah perenggan (b) fasal (1) dan fasal (2) undang-undang kecil ini boleh dibuat hanya jika semua kerugian terkumpul telah dihapus kira sepenuhnya.

(4) Dengan kelulusan Ketua Pendaftar, Koperasi ini boleh, sekiranya kerugian terkumpul tidak dihapus kira sepenuhnya, menggunakan untung bersih terauditnya untuk pembayaran dividen kepada anggota-anggotanya tidak melebihi lima peratus daripada jumlah syer atau yuran atau kedua-duanya sepertimana yang dinyatakan di bawah subseksyen 57(8) Akta.

66. (1) Kadar dividen yang dibayar atas syer-syer atau yuran atau kedua-duanya kepunyaan tiap-tiap anggota seperti pada enam bulan sebelum akhir tahun kewangan, mengikut peraturan 24 Peraturan hendaklah tidak melebihi sepuluh peratus kecuali dengan kelulusan Ketua Pendaftar. Seseorang yang namanya tidak ada dalam daftar nama anggota Koperasi ini pada akhir tahun kewangan yang berkenaan tidak layak untuk mendapat dividen.

(2) Dividen hendaklah dikreditkan ke akaun modal syer anggota sekiranya anggota itu tidak meminta dibayar kepadanya secara tunai dalam tempoh tiga puluh hari dari tarikh dividen itu diisytiharkan.

(3) Potongan kerana langganan boleh diberikan hanya jika langganan seseorang anggota tidak kurang daripada lima puluh ringgit dalam tahun kewangan yang berkenaan.

**Dividen,
potongan
kerana
langganan dan
lain- lain.**

BAHAGIAN VII

AKAUN DAN AUDIT

67. Tahun kewangan Koperasi ini bermula pada satu haribulan Julai dan berakhir pada tiga puluh haribulan Jun.

**Tahun
kewangan.**

68. (1) Lembaga hendaklah menentukan bahawa rekod-rekod akaun dan rekod-rekod lain disimpan dengan sempurna dan kemaskini menurut seksyen 58 Akta, mengenai —

**Penyenggaraan
buku-buku dan
audit.**

- (a) tiap-tiap transaksi Koperasi ini dan subsidiari atau subsidiari-subsidiarinya, jika ada;
- (b) aset-aset tetap dan pelaburan-pelaburan Koperasi ini dan subsidiari atau subsidiari-subsidiarinya, jika ada;
- (c) deposit-deposit yang dibuat oleh Koperasi ini dan subsidiari atau subsidiari-subsidiarinya, jika ada;
- (d) syer, yuran serta simpanan khas yang dicarum oleh anggota-anggota; dan
- (e) rekod-rekod dan daftar-daftar lain sebagaimana yang dikehendaki oleh Ketua Pendaftar.

(2) Bagi memastikan bahawa kesemua rekod-rekod perakaunan dapat diaudit dalam tempoh yang ditetapkan, Lembaga bolehlah melantik mana-mana individu atau firma untuk mengemaskinikan rekod-rekod tersebut dengan bayaran upah yang berpatutan.

(3) Menurut subseksyen 58(4) Akta, rekod-rekod akaun hendaklah disimpan di ibu pejabat Koperasi pada sepanjang masa melainkan jika Ketua Pendaftar mengarahkan supaya disimpan di tempat lain dan hendaklah disimpan oleh Koperasi selama enam tahun selepas diaudit seperti yang dinyatakan di bawah subperaturan 29(3) Peraturan.

(4) Rekod-rekod ini boleh diperiksa oleh anggota-anggota pada bila-bila masa mengikut syarat-syarat mengenai pemeriksaan sebagaimana yang ditetapkan oleh Lembaga.

(5) Catatan dalam akaun-akaun Koperasi dan subsidiari atau subsidiari-subsidiarinya, menurut subseksyen 58(2) Akta hendaklah dibuat dengan seberapa segera yang mungkin tetapi tidak lewat daripada tiga puluh hari selepas sesuatu transaksi. Penyediaan akaun-akaun bagi sesuatu tahun kewangan hendaklah dibuat dengan seberapa segera tetapi tidak lewat daripada dua bulan selepas tamatnya tahun kewangan itu supaya akaun-akaun itu dapat diaudit dan dibentangkan di dalam mesyuarat agung perwakilan tidak lewat daripada enam bulan selepas tamatnya tahun kewangan itu.

(6) Butir-butir terperinci perbelanjaan Lembaga dan pembayaran-pembayaran

kepada tiap-tiap anggota Lembaga dan anggota jawatankuasa-jawatankuasa termasuk Jawatankuasa Audit Dalamam hendaklah dimaklumkan kepada mesyuarat agung perwakilan melalui nota-nota kepada akaun untung rugi sepertimana yang dikehendaki di bawah subperaturan 29(2) Peraturan.

(7) Ketua Pendaftar boleh menurut subseksyen 58(5) Akta, dalam kes-kes tertentu memerintahkan supaya rekod perakaunan Koperasi diserahkan untuk diperiksa oleh seseorang juruaudit yang bertindak bagi pihak seseorang anggota atau pegawai.

69. (1) Resit-resit Koperasi hendaklah dikeluarkan bagi semua wang yang diterima olehnya. Resit-resit itu hendaklah ditandatangani oleh bendahari atau pegawai yang diberikuasa oleh Lembaga dari semasa ke semasa.

**Resit-resit dan
baucar.**

(2) Baucar hendaklah disediakan bagi setiap pembayaran yang dibuat oleh Koperasi. Baucar-baucar tersebut hendaklah ditandatangani oleh bendahari atau pengurus serta disahkan oleh dua orang daripada pegawai-pegawai yang diberikuasa oleh Lembaga dari semasa ke semasa.

70. Menurut subseksyen 60(1) Akta, akaun-akaun dan rekod-rekod yang perlu berkaitan Koperasi ini hendaklah diaudit oleh seorang juruaudit yang dipilih oleh mesyuarat agung perwakilan dan dilantik melalui suatu suratcara perlantikan menurut perenggan (b) subperaturan 27(2) Peraturan.

**Pengauditan
akaun-akaun.**

71. (1) Bagi maksud subseksyen 63(1) dan (2) Akta, juruaudit yang dilantik hendaklah memberi laporan mengenai penyata-penyata kewangan yang dikemukakan oleh Koperasi selepas berakhirnya tahun kewangan itu untuk perhatian Ketua Pendaftar serta anggota-anggota Koperasi ini.

**Perlantikan
juruaudit.**

(2) Perlantikan juruaudit dan penyerahan kepadanya rekod-rekod perakaunan dan rekod-rekod lain Koperasi ini untuk maksud pengauditan menurut subperaturan 27(4) Peraturan hendaklah dimaklumkan kepada Ketua Pendaftar dengan mengemukakan satu salinan suratcara perlantikan yang dimaksudkan dalam undang-undang kecil 70.

(3) Bagi maksud subperaturan 27(3) Peraturan, suatu senarai lengkap buku-buku dan dokumen-dokumen Koperasi ini yang diserahkan kepada juruaudit hendaklah disediakan oleh Koperasi untuk ditandatangani oleh juruaudit itu sebagai pengakuan penerimaannya. Sesalinan senarai itu hendaklah disimpan oleh Koperasi.

72. Satu salinan akaun perdagangan, akaun untung rugi, penyata sumber-sumber dan penggunaan wang, kunci kira-kira dan laporan Lembaga mengenai kedudukan hal-ehwal Koperasi dan subsidiari atau subsidiari-subsidiarinya yang telah dikemukakan untuk mendapat pandangan Ketua Pendaftar menurut subseksyen 59(2) Akta, laporan juruaudit dan laporan Jawatankuasa Audit Dalamam hendaklah disampaikan kepada tiap-tiap perwakilan tidak lewat daripada lima belas hari sebelum mesyuarat agung perwakilan tahunan.

**Mengemukakan
penyata
kewangan dan
laporan-laporan.**

BAHAGIAN VIII

PELBAGAI

73. Akaun bank bagi Koperasi ini hendaklah diuruskan bersama oleh pengerusi, bendahari dan setiausaha, atau pegawai yang diberi kuasa oleh Lembaga dari semasa ke semasa. **Akaun bank.**
74. (1) Koperasi ini hendaklah ada satu mohor. Mohor ini tidak boleh dimeteraikan di atas mana-mana surat melainkan dengan keputusan Lembaga. Pengerusi, setiausaha dan bendahari atau pegawai-pegawai lain yang diberikuasa oleh Lembaga dikehendaki menurunkan tandatangan mereka di atas tiap-tiap surat yang hendak dimeteraikan. **Mohor Koperasi.**
- (2) Dokumen-dokumen yang diperbuat atas nama Koperasi sama ada dimeteraikan atau tidak, dan ditandatangani dengan sahnya oleh pengerusi, setiausaha dan bendahari atau pegawai-pegawai lain yang diberikuasa oleh Lembaga hendaklah disifatkan mengikat ke atas Koperasi sehingga sebaliknya dibuktikan.
75. Tiap-tiap anggota hendaklah memberitahu setiausaha akan segala pertukaran alamatnya. Semua surat kepada anggota yang dihantar dengan pos atau dikirimkan kepada alamatnya yang terakhir hendaklah dianggap sebagai telah disampaikan. **Pertukaran alamat anggota.**
76. Bagi maksud seksyen 13 Akta, setiausaha hendaklah menyediakan — **Penyediaan dokumen untuk diperiksa.**
- (a) satu salinan Akta dan Peraturan;
 - (b) satu salinan Undang-undang Kecil ini dan jika ada aturan-aturan aktiviti;
 - (c) akaun teraudit Koperasi yang terakhir; dan
 - (d) satu senarai lengkap anggota Koperasi ini,
- yang terbuka untuk diperiksa oleh anggota-anggota Koperasi ini sahaja tanpa apa-apa bayaran, pada masa-masa yang munasabah di alamat berdaftar Koperasi ini.
77. Penyerahan tugas secara rasmi hendaklah dilakukan apabila berlaku pertukaran bagi apa-apa jawatan dalam Koperasi ini. Penyerahan tersebut hendaklah disempurnakan dalam tempoh tidak lewat daripada empat belas hari selepas berkuatkuasanya pertukaran itu. **Penyerahan tugas.**
78. (1) Seseorang yang dilantik untuk mewakili Koperasi ini di dalam apa-apa mesyuarat, seminar, forum atau lawatan sambil belajar atas perbelanjaan Koperasi ini sama ada di dalam atau di luar negeri mengikut peraturan 46 Peraturan, hendaklah mengemukakan laporan ringkas kepada mesyuarat agung perwakilan tahunan yang akan datang yang terawal diadakan bagi Koperasi ini. **Laporan oleh seseorang yang dilantik mewakili Koperasi.**
- (2) Jika orang itu gagal mengemukakan laporan, dia hendaklah membayar balik semua perbelanjaan yang telah ditanggung oleh Koperasi ini. Koperasi berhak mendapatkan balik setiap perbelanjaan tersebut seolah-olah ianya suatu hutang yang kena dibayar kepada Koperasi ini.
79. Lembaga bolehlah melantik seorang kenamaan sebagai Yang Dipertua **Perlantikan**

kepada Koperasi ini. Dia hanya bertindak sebagai penaung dan boleh menghadiri mana-mana mesyuarat yang diadakan oleh Koperasi ini tetapi tidak mempunyai hak untuk mengundi.

**Yang
Dipertua.**

80. (1) Segala pertikaian seperti yang disebutkan di bawah subseksyen 82(1) Akta yang menyentuh hal penubuhan, Undang-undang Kecil, pemilihan pegawai-pegawai, perjalanan mesyuarat-mesyuarat agung, pengurusan atau perniagaan Koperasi ini hendaklah dirujuk kepada Ketua Pendaftar atau tribunal menurut tatacara di bawah peraturan 33 Peraturan.

Pertikaian.

(2) Mana-mana anggota yang dibuktikan telah membuat pengaduan atau merujuk pertikaianya kepada mana-mana orang selain daripada Ketua Pendaftar atau tribunal hendaklah dianggap telah bertindak dengan cara yang memudaratkan kepentingan Koperasi ini dan boleh dikenakan tindakan menurut undang-undang kecil 22.

(3) Segala pertikaian selain daripada yang dinyatakan dalam subseksyen 82(1) Akta hendaklah dirujuk kepada mesyuarat agung perwakilan Koperasi ini untuk penyelesaian. Apa-apa persoalan tentang sama ada pertikaian tersebut termasuk dalam maksud subseksyen 82(1) Akta hendaklah diputuskan oleh Ketua Pendaftar atau tribunal dan keputusannya adalah muktamad.

81. Koperasi ini boleh dibubarkan hanya dengan perintah Ketua Pendaftar.

Pembubaran.

82. (1) Undang-undang Kecil ini adalah dibuat mengikut peraturan 5 Peraturan dan hendaklah tertakluk kepada peruntukan-peruntukan Akta dan Peraturan. Apa-apa pindaan kepada Undang-undang Kecil ini tidak boleh dibuat melainkan dengan kehendak atau kebenaran Ketua Pendaftar. Aturan-aturan aktiviti tidak boleh dibuat melainkan dengan kelulusan mesyuarat agung perwakilan.

**Akta,
Peraturan dan
Undang-undang Kecil.**

(2) Apa-apa urusan Koperasi ini hendaklah tertakluk kepada Akta, Peraturan dan Undang-undang Kecil ini serta aturan-aturan aktiviti, yang hendaklah dibaca bersekali.

83. Undang-undang Kecil ini menurut seksyen 17 Akta hendaklah mengikat Koperasi ini dan anggota-anggotanya sehingga takat yang sama seolah-olah Undang-undang Kecil ini telah ditandatangani oleh tiap-tiap anggota dan mengandungi waad pada pihak setiap anggota bagi dirinya sendiri dan bagi penggantinya untuk mematuhi segala peruntukan Undang-undang Kecil ini.

**Undang-undang Kecil
hendaklah mengikat
anggota.**

Diakui Undang-undang Kecil ini telah dibentang, dibincang dan diluluskan di dalam mesyuarat agung Ke-9 pada Satu haribulan Mac tahun seribu sembilan ratus sembilan puluh tujuh.

.....
(Meriyam bt. Abd. Majid)

Pengerusi

.....
(Khalidi bin Duamin)

Timbalan Pengerusi

.....
(Md Faridi bin Abd. Rahim)

Setiausaha